

Ol wanblut bilong yumi i pas long Jisas.

Sunday, September 3, 2017.

Moning.

Las wik long Sande Baibel Toktok yumi skelim **Efesus 3:1-13** na yumi kisim save long Pol yet – em i wanem kain man na em i wanem kain wokman bilong God. Tasol Pol em i no mekim dispela toktok long **Efesus 3:1-13** bai yumi ken i save long em tasol. Nogat. Yumi ken i save long em, tasol em i mekim dispela toktok bilong soim yumi narapela samting – samting i bikpela samting stret – samting i as bilong plen na wok bilong God long hia long dispela graun.

Nau bai yumi skelim **Efesus 3:1-13** gen na yumi kisim save long dispela bikpela samting Pol i tokaut long en.

¹ Mi Pol, mi kalabusman bilong Krai Jisas. Mi bin mekim wok namel long yupela ol lain Jentail na long dispela as mi stap nau long kalabus.

² Ating yupela harim pinis olsem, God i bin makim mi na Em i givim wok long mi long karim grasias bilong Em i go long yupela. ³ Mi tok nau long tok hait God i bin soim mi. Long dispela tok mi raitim liklik hap pinis long yupela. ⁴ Taim yupela ritim dispela tok yupela bai klia olsem God i givim gutpela save long mi long dispela tok hait bilong Krai. ⁵ God i no putim dispela tok hait long ples klia long ol narapela jeneresen. Nau tasol Holi Spirit i putim dispela tok hait long ples klia long ol holi aposel na profet bilong God. ⁶ Na dispela tok hait i olsem, olgeta samting God i promisim ol lain Israel ol lain Jentail tu bai kisim.

Tupela i stap long wanpela bodi tasol na tupela wantaim bai kisim olgeta samting God i bin promisim long wok bilong Krai. Na ol dispela samting i kamap long rot bilong gutnius.

⁷ God i bin mekim mi kamap wokman bilong autim dispela gutnius. Em i bin mekim strongpela wok na mekim grasias long mi na Em givim dispela wok long mi. ⁸ Namel long ol manmeri bilong God mi yet mi man nating tumas. Tasol God i mekim grasias long mi na Em i givim dispela wok long mi. Na dispela wok i olsem, mi mas karim gutnius i go long ol lain Jentail. Mi mas tokim ol long olgeta gutpela samting Krai i bin mekim. ⁹ Mi mas mekim plen bilong dispela tok hait i kamap klia olgeta long olgeta manmeri. God i wokim olgeta samting, na Em i holim dispela tok hait long tingting bilong Em i kam i kam inap long nau. ¹⁰ God i mekim olsem bilong ol samting bilong heven i ken i lukim wok Em i mekim long sios na ol i ken i klia olsem, save bilong Em i moa moa yet. ¹¹ Ol dispela samting em i plen bilong God bilong oltaim oltaim, na long wok bilong Krai Jisas, BIKPELA bilong yumi, God i kamapim pinis plen bilong Em. ¹² Yumi ken i kam bek long God na yumi no inap sem o pret bikos Krai i bin feitful long mekim wok. ¹³ Olsem na, mi laik tokim yupela olsem, yupela no ken i pilim hevi long dispela pen mi karim bilong helpim yupela. Nogat. Dispela pen mi karim em i gutpela samting tru bilong yupela.

Sios em i as bilong plen bilong God.

Long **lain 2-10** Pol em i tok olsem, wanpela samting i hait pastaim, tasol nau Holi Spirit bilong God i putim dispela hait samting long ples klia long ol aposel na long ol profet. Ol narapela jeneresen bipo ol i no klia gut long dispela samting. Tasol nau Holi Spirit i putim dispela hait samting long ples klia na yumi olgeta yumi ken i save long em.

Na dispela tok hait em i wanem samting? Lukim **lain 6**. Ol wanwan *Jentail* manmeri na ol wanwan *Israel* manmeri bai i stap long wanpela bodi – Pol i minim wanpela nupela komyuniti – em i tok long sios – ol wanwan *Jentail* manmeri na ol wanwan *Israel* manmeri bai i stap long sios (wanpela bodi) na tupela wantaim bai kisim olgeta samting God i bin promisim.

God i bin promisim wanem samting?

God i bin promisim olgeta blesim bilong heven (lukim **Efesus 1:3**). Olsem na, em i no ol Israel manmeri tasol bai kisim. Nogat. Ol wanwan *Jentail* manmeri i pas long Krai wantaim ol wanwan *Israel* manmeri i pas long Krai – tupela *wantaim* bai pas long Krai na kisim olgeta blesim bilong heven.

Long **lain 7-10** Pol em i stori olsem, “God i bin makim mi na mekim mi kamap wokman bilong autim dispela tok hait – *dispela gutnius* – long olgeta manmeri.”

Orait, nau lukim **lain 11**. Pol i tok olsem, “*Ol dispela samting em i plen bilong God bilong oltaim oltaim, na long wok bilong Krai Jisas, BIKPELA bilong yumi, God i kamapim pinis plen bilong Em.*”

Ol dispela samting – dispela nek i makim ol dispela samting we God i pasim ol wanwan manmeri wantaim long wanpela nupela sios komyuniti femili bilong God – ol dispela samting em i plen bilong God bilong oltaim oltaim. God Em i gat wanpela plen bilong Em tasol – Em i bosim na kontrolim na wokim olgeta samting bilong kamapim sios femili bilong Em. Sios femili tasol em i as bilong plen bilong God.

Sios em i wanem samting?

Sios em i manmeri God i bin makim na pasim long Krai, na Krai i bin mekim wok bilong mekim ol i kamap holi na i no gat asua long ai bilong God. Sios em i manmeri God i bin adoptim na mekim ol i kamap femili bilong Em. Sios em i manmeri Holi Spirit i bin mekim wok long laip bilong ol na Em i opim ai na ia na bel bilong ol na ol i luksave long wok Krai i bin mekim bilong ol, na ol i harim tok Krai i tokim ol, na ol i tanim bel na bilipim na trastim feifful wok bilong Krai na ol i stap aninit tru long Krai. (Lukim **Efesus sapta 1**.)

Orait na taim ***ol dispela kain manmeri*** i pas wantaim, ol i sios bilong God. Em olsem na taim ***ol dispela kain manmeri*** long taun Efesus i pas wantaim, orait ol i sios bilong God. Na taim ***ol dispela kain manmeri*** long wanpela taun bilong P.N.G. i pas wantaim, orait ol i sios bilong God. Na taim ***ol dispela kain manmeri*** long wanpela viles long P.N.G. i pas wantaim, orait ol i sios bilong God.

Na bihain God bai kisim ol dispela wanwan sios Em i bin kamapim na Em bai pasim ol long wanpela bikpela sios long heven, na olgeta bai pas i go i go i go olgeta oltaim oltaim. (Lukim **Efesus 1:9-10**.) Dispela em i plen bilong God bilong oltaim oltaim.

Sios femili bilong God.

Sapos yu tanim bel na yu bilipim na trastim God long kisim bek yu long feifful wok bilong Jisas na yu bihainim Jisas, orait yu ken i save olsem, God i bin makim na pasim yu long Krai. Krai i bin mekim wok bai God i kisim bek yu, na Holi Spirit i bin givim bilip long yu, bai yu lusim olupela femili bilong dispela graun na yu pas long wanpela nupela femili we Krai Em i het. Dispela em i trupela femili bilong yu nau.

Na bai yu stap wantaim ol dispela manmeri oltaim oltaim long heven. Yu no inap i stap wantaim ol femili bilong yu bilong dispela graun. Nogat. Long heven olgeta femili bilong dispela graun bai pinis, na femili bilong God tasol bai i stap wantaim God na wantaim Krai.

Yumi i pas long Jisas na long feifful wok bilong Em orait yumi mas stretim tingting bilong yumi. Yumi mas senisim tingting bilong yumi. Na yumi mas tingim sios femili bilong Jisas em i nambawan femili bilong yumi.

Olsem na, yumi mas lukautim na stap wantaim ol sios femili manmeri wankain olsem ol i wanblut bilong yumi – ol i brata na susa trutru bilong yumi. Lukautim ol, pas wantaim ol, prea wantaim ol, harim tok bilong God wantaim ol, raun wantaim ol, lavim ol, na mekim gutpela long ol.

Glenn.